

Дыңнап бижиир эдертигнің сөзүглели

Арылар

Ук төөгү мынчаар эгелээн чүве-дир. Эрен-оол хоюнун чоогунга чоокшулап чоруй, сөөскен аразында бир-ле чараш чүве көрүп каан. Лаптуу бөмбүү дег, артында-ла хээленчек борбак куу чүве. Чоокшулап кээп ылавылаарга, арай чемдигир-даа ышкаш болган. «Аа, дыдык боорга ээзи октапкан-дыр» кылдыр бодап, бөмбүктү кургаг сөөскен-биле илбектептер дээн: карак-ла бо, оозу хылырт дээш мыйырлы берген. Өө-аа дизе-ле-арылар! Сан-түң чок имиңейни-ле берген! Холун көдүрүп, чалданып чытпыже, даш-биле хапкан дег, хаваанга бир чүве чык дээн. Сегирип аары билек, чаагынга база бирээ чым сырт кылган. Эрен-оол саргыгылаштыр кадалы берген арыны чылча тудупкаш, шаашкактаан молдурга дег, ыдып ыңай-ла болган. Ажыырынга шыдавайн, доңгайып чыдыпкаш, доозунналдыр тепкиленмишаан, ыглап бадырыпкан.

Карак чажындан Эрен-оолдун чаагы улам ажып, кижип эгелээн. Ам кээп оваарнып, ызын тыртып алган. Аарып ажаан черлерни нугугулап туруп кээрге, хойлары ийи үстү берген, чамдызы дагже үнүп бар чораан. «Чаңгыс-даа башты ышкынмас» деп авачазының сөзүнүн утказын Эрен-оол эки билир. Ынчангаш дегийт-ле тура халаан. Ырап бар чораан хоюн дайгырып чорааш, кыңчыктырбайн дозуп, суггарып алгаш, дыттар хөлегезинге бөлүп чыттырып алган. Чүгүргүлээрге, ары шапкан чаагы ыжып, бир караа хапыйып чоруй мырыңай дуглалыр дей берген. Ам кезээн, сээк караш дээрге-ле, холун карбаш кылып, хоюган аът дег, былдай дүжүп чораан.

(К. Чамыян)